

TEZAU LITURGIC
29 DECEMBRIE

ACATISTUL
SF. CUVIOS
LAVRENTIE
PROSCURA
DE LA
CERNIGOV

I



MOSCOVA, 2000



Акафист

святому преподобному

Лаврентию Черниговскому

Кондак 1

Избранный угодниче Божий и преславный чудотворче, преподобне Лаврентие, повеление приим Царицы Небесныя приити в древний град Чернигов вселитися во обитель Пресвятыя Троицы, идеже праведно пожив, изгнание претерпев и стадо иночествующих собрав, словом Божиим их напита и ко Христу приведый. Ты же яко имея дерзновение ко Пресвятей Троице, молися избавити ны от всяких бед и скорбей, да со умилением благодарственно зовём ти:

Радуйся, преподобне Лаврентие, усердный и богоприятный о душах наших молитвенниче.

Икос 1

Ангелов подражатель явился еси, преподобне и богоносне отче Лаврентие, свято и праведно пожив на земли, и нам оставив образ совершенства духовнаго. Мы же, видя тя сосуде изрядный, Божию Материю возлюбленный,

обитель Пресвятыя Троицы святым твоим житием и чудесы украсивый, благодаряще Бога, прославляем тя яко велие светило, прилежно зовуще ти сице:

Радуйся, служителю Пресвятыя Троицы;
Радуйся, предивный избранниче Божия Матери.

Радуйся, любве ради Господа всякое наслаждение земное оставивый;

Радуйся, вся блага мира сего Христа ради презревый.

Радуйся, яко богатство нетленное обрел еси;
Радуйся, иго Христова благое и легкое возлюбивый.

Радуйся, во плоти яко безплотен поживый;
Радуйся, тобою бо помыслы нечестия обличаются.

Радуйся, дела благая и полезная тобою благословляются;

Радуйся, тобою верным путь к Небеси указывается.

Радуйся, преподобне Лаврентие, усердный и богоприятный о душах наших молитвенниче.

Кондак 2

Видевше тя, отче Лаврентие, силою Господа умудренный преосвященный Антоний, повеле прийти во град Чернигов во обитель Троице-

Ильинскую, идеже икона Пресвятыя Госпожи Владычицы Марии бе, ты же, внимая его прошению, усилил молитву, тогда Сама Царица Небесная благослови тя, ты же, пришед яко на гору високу, место богоизбранна селения иноческаго обрел еси, обитель во славу Пресвятыя Троицы и Божией Матери: иночествующия в подвизах укрепил, ревнующия о восхождении на Небо, от веры в веру, и от добродетели к добродетели собрав купно с тобою пети в Троице Единому Богу: Аллилуиа.

Икос 2

Разум божественный вразуми тя, отче Лаврентие, оставити мир и яже в мире, пришед во обитель Рыхловскую святителя Николая, желая подвизатися всем сердцем Христу Богу, Ему же усердно чтением и пением подвизаяся и в иных послушаниях работая ради ближних. Мы же, видя тя сосуд Святаго Духа, умильно зовем ти:

Радуйся, от юности пламенно житие монашеское возлюбивый;

Радуйся, старость матери твоея успокоивый.

Радуйся, по смерти тоя во обитель святителя Николая пришедый;

Радуйся, премудростию Божиею люди удививый.

Радуйся, иночествующим правило и образ бывый;

Радуйся, честную и боголюбезную чистоту непорочно сохранивый.

Радуйся, узкими и тесными враты во Царствие Небесное возшедый;

Радуйся, венец неувядаемый от Господа достойно приемый.

Радуйся, на Небеси и на земли прославленный;

Радуйся, яко житие, деяния и вещания твоя не точию в России, но и по всей земле известна суть.

Радуйся, преподобне Лаврентие, усердный и богоприятный о душах наших молитвенниче.

Кондак 3

Силою свыше архиереи града Чернигова священномученицы Василий и Пахомий видевшие тя украшена житием богоугодным, велие твое смирение, постом и молитвою сияющее, и верныя люди мудро наставляюща, зело возлюбиша тя и не возбраниша ти людей к тебе приходящих наставляти, воспоем разумно Пресвятей Троице: Аллилуиа.

Икос 3

Имея истинное смирение, и велие послушание, пришед во святую обитель

Пресвятая Троицы и возрев на образ Богоматери Троице-Ильинския, держащая Богомладенца Иисуса на пречистых Своих руках, узнав Ю Пренепорочную, тебе явльшуюся, пал на землю пред Нею, прося помощи и покровя. Мы же, видя твое предание воле Божией, вопием таковая:

Радуйся, послушание Божией Матери явивый;

Радуйся, послуживый верным во граде Чернигове.

Радуйся, образ Тоя чудотворный во обители узревый;

Радуйся, пред сим образом усердно моливыйся.

Радуйся, алчущим и жаждущим правды глаголы живота вечнаго возвестивый;

Радуйся, ищущим путь спасения указавый.

Радуйся, мудрый в Горнее Царство предводителю;

Радуйся, во благочестии труждающихся помощниче.

Радуйся, немудрых благостный учителю;

Радуйся, теплый о всем мире заступниче.

Радуйся, преподобне Лаврентие, усердный и богоприятный о душах наших молитвенниче.

Кондак 4

Бог, принесший Себе в жертву за грехи всего мира, и воскресший из мертвых со славою, вознесыйся на небо, сподоби тя путешествие сотворити во Иерусалим, идеже ты, треблаженне, усердно о Русской стране моляся и свеча в твоих руцех небесным огнем сама возжеса, ты же со всеми верными воспел еси Иисусу Христу, грядущему судити живым и мертвым богокрасную песнь: Аллилуиа.

Икос 4

Слышавшие пастырие Христовой Церкви, яко буря страстей и треволение многомятежнаго мира не поколеба тя, в тихое пристанище спасения душу твою управив, преподобне отче, вся благая и красная мира презрев, иноцы других обителей стекахуся на поучения твоя и вернии российстии людие притекаху из дальних градов и весей в напастех и скорбех утешение и ободрение, болящия исцеление, и дары благодати Божия молитвами твоими от Щедродавца Бога обильно приемлюще: архиерей освяти ты быти архимандрита, достойную почесть трудам твоим воздавая, и подвизая ны благохвалити тя сими похвалы:

Радуйся, Агнца и Пастыря верный

служителю;

Радуйся, олтаря Господня непорочный
предстоятелю.

Радуйся, яко Царя Славы со Ангелы
воспеваеши;

Радуйся, богомудрый иноков и верных людей
наставниче.

Радуйся, слезнаго умиления преисполненный;
Радуйся, даров Святаго Духа честное
вместилище.

Радуйся, совершеннаго терпения
подвижниче;

Радуйся, Пресвятая Троицы избранное
жилище.

Радуйся, истиннаго смирения изрядный
учителю;

Радуйся, благочестия утверждение и
Православия похвало.

Радуйся, преподобне Лаврентие, усердный и
богоприятный о душах наших молитвенниче.

Кондак 5

Боготечную звезду видевшие ты, преподобне
отче Лаврентие, житием и учением светло
сияющая, иноцы и вернии последоваша зари
светлаго жития твоего, яко светильника
держашася тебе, и се прииде безбожное иго и
жидовское нечестие вкупе со тмами соборы

самосвяты и живисты и прочие еретицы и раскольницы, попраша святыни, ты же яко пастырь добрый не оставив град Чернигов и верныя люди, противу церкве пророка Илии и пещер преподобнаго Антония живя в дому вдовы честныя и благоговейныя монахини Евлампии, вся верныя приводя к Непрístupному Свету, моляся о стране Российстей, да управит ю Бог на возрождение царства православнаго, и приим от Архангела Гавриила о сем откровение, зело возрадовался, вопия вкупе со всеми верными Пресвятей Троице: Аллилуиа.

Икос 5

Видеша благовернии людие града Чернигова исполнение твоих пророчеств: церквей Божиих открытие и возобновление, ты же, украсив боголепно дом Пресвятыя Троицы и Богородицы, и собрав велие стадо хотящих иночествовати и желающих последовати твоему истинному наставлению, их же нелестно поучая призывати непрестанно имя Божие и людем верным помогая, возвращение мощей святителя Феодосия предрек, и архиерею Борису совет преподав на прежнее место славно положити в Спасове соборе Преображения, еже он и содела. Мы же хвалим Бога, давшего ти дух

пророчества и премудрости и просим тя,
молися, святе Лаврентие, о спасении нас
грешных, поющих ти:

Радуйся, иноков богомудрый руководителю;
Радуйся, яко мощи святителя Феодосия обрел
еси.

Радуйся, пришествие мощей святителя
Феодосия песнями пасхальными прославивый;
Радуйся, устава церковного неленостный
исполнителю.

Радуйся, болящих врачу благоискусный и
безмездный;

Радуйся, скорбящих благоприятное
утешение.

Радуйся, унывающих благодатное ободрение;
Радуйся, душетленных страстей прогонителю.
Радуйся, бесноватых от насилия демонского
свободителю;

Радуйся, беспомощных скоропредстательный
помощниче.

Радуйся, преподобне Лаврентие, усердный и
богоприятный о душах наших молитвенниче.

Кондак 6

Проповедуя слово Божие всем, отче
Лаврентие, научая словом и житием твоим
безмолвию, братолюбию, странноприимству,
смирению, посту, молитве и страху Господню,

иже есть начало премудрости, ею же осененный, не изменив до старости маститыя иноческаго правила, неленостно подвизаяся в молитвах деннонощных, и воспевая, дающему ти крепость и силу, хвалебную песнь Богу: Аллилуиа.

Икос 6

Возсия нам, яко звезда светозарная и путеводящая, воздержное постническое житие твое, преподобне отче Лаврентие, не тужил бо еси о брашне, еже не поставит ны пред Богом, не радел о одеждех ризных, предпочитая благоукрашати душу твою добродетельми. Кончину твою трикраты предрек и течение временнаго жития добре совершив. Нетлением и чудесы прославлен от Спаса Христа, от нас же приими сия хвалы:

Радуйся, постническаго лика украшение;

Радуйся, образе целомудрия и воздержания.

Радуйся, звездо в сонме преподобных сияющая;

Радуйся, иноков пастырю и мирских людей учителю.

Радуйся, в мире живущих заступниче и покровителю;

Радуйся, истинный Евангелия Христова последователю.

Радуйся, благодатию Божией насыщенный;

Радуйся, от Источника живота слова Божия напоенный.

Радуйся, ризою спасения облеченный и одеждою нетления одеянный;

Радуйся, прежде общего Воскресения от Господа нетлением телесе во уверение всех человек прославленный.

Радуйся, преподобне Лаврентие, усердный и богоприятный о душах наших молитвенниче.

Кондак 7

Хотя верен быти подражатель Агнца Божия взяшаго грехи мира, кротость и смирение взял на себе, отче наш Лаврентие, вся скорби и обиды без ропота претерпев, ведый, яко скорбями временными искупается вечное спасение, совершеннаго безстрастия достигнув, и егда прииде твоя честная кончина, ты еще на земли достойно и праведно воспел Ангельскую песнь Вседержителю Богу: Аллилуиа.

Икос 7

Дивен Господь во святых Своих, дивно ты показа победоносца противу врагов спасения нашего видимых и невидимых, и по блаженнем успении прослави, ты же, преподобне отче Лаврентие, ожидая место погребения, пребывал плотию с нами четырнадцать дней и ночей, и во сие время не умолкаху у гроба твоего

молитвы и слезы, душею предстоя Престолу Божию, моляся о Святей Руси и верных людех, показа нетление твоего телесе во уверение воскресения всех человек. От гроба же твоего исхождаше велие благовоние, уверяя ны в святем животе твоём. Мы же дивящися, восхваляем ти тако:

Радуйся, всякое сладострастие в себе искоренивый;

Радуйся, плоть твою духу покоривый.

Радуйся, бдении всенощными ополчивыйся противу искушений вражиих;

Радуйся, постом неослабным обуздавый всякое нечистое желание.

Радуйся, молитвою непрестанною очистивый себе от всякия скверны;

Радуйся, всего себе Богу посвятивый.

Радуйся, за словеса Господня пути жестоки сохранивый;

Радуйся, слезами пожав радость присносущную.

Радуйся, четырнадцатодневным стоянием телесе твоего ны утешивый;

Радуйся, яко и по смерти нас не оставляеши.

Радуйся, преподобне Лаврентие, усердный и богоприятный о душах наших молитвенниче.

Кондак 8

Странника и пришельца помышляв себе быти в мире сем непостояннем, преподобне Лаврентие, и града небеснаго взыскуя, Царство Божие еще на земли устрояя, сохраняя верныя от безбожнаго нечестия, губительных автокефальных самосвятот и обновленных живистов, латинствующих и унии, и иных множества еретик и раскольник, вкупе с благочестивыми сладце воспевал победную песнь Животворящей Троице: Аллилуиа.

Икос 8

Весь облеклся еси во вся оружия Божия, яко победоносный воин Христов, препоясав чресла твоя истиною, оболкся в броню правды, обув нозе твой во уготования мира, восприяв щит веры и шлем спасения и меч духовный, иже есть глагол Божий, им же победив вся наветы лукаваго. Ты же, святе Лаврентие, древним отцем подобен быв, верныя во благочестии укрепил, и многия заблудшия и неверныя к Богу обратил, веру Православную защитил и утвердил, еретицы, раскольницы и инако мыслящия посрамил и вразумил. Помози, преподобне, и нам твоим ходатайством у престола Пресвятыя Единосущныя и Нераздельныя Троицы устояти, темным силам

антихриста и слуг его и противитися
искушениям вражиим, веруя во Едину Церковь
по твоему глаголу, иже во Святем Евангелии.
Мы же от чиста сердца молим тя, приими сия
похвалы:

Радуйся, преподобному Антонию Печерскому
уподобивыйся копанием пещеры;

Радуйся, якоже и Феодосий стояти до смерти
во Православней вере заповедавый.

Радуйся, якоже Сергей Радонежский
строителю и возобновителю иноческих обителей;

Радуйся, отриватися унии, самосвятства и
иных ересей поучаеши, якоже Иов Почаевский.

Радуйся, верныя наставивый, якоже
Серафим Саровский;

Радуйся, грозного времени возвестителю и
покаяния проповедниче, якоже Иоанн
Кронштадтский и преподобномученик Алипий.

Радуйся, устава преподобных отец Феодора
Студита и Саввы Освященного ревностный
исполнителю;

Радуйся, нарушителей церковного устава
строгий вразумителю и наказателю.

Радуйся, противу латинства стоявый якоже
преподобномученицы Макарий Овручский и
Афанасий Брестский;

Радуйся, святым песнословием Роману
Сладкопевцу подобен бывый.

Радуйся, преподобне Лаврентие, усердный и богоприятный о душах наших молитвенниче.

Кондак 9

Всем сердцем Единого Бога возлюбив, тем же и Господь тя возлюби, и чудеса прослави, дарова нам тебе молитвенника пред благостию Его. Смиренно молим тя, умоли Судию Праведного в день Страшный за ны, да не помянет грехов и беззаконий наших, и сподобит ны участи блаженныя одесную стоящих и поющих Ему: Аллилуиа.

Икос 9

Ветии многовещанныя не довлеют изглаголати вся подвиги и чудеса твоя, богомудре отче Лаврентие: ибо доброта жития твоего воистину превосходит похвалу человеческую: обаче мы, любовь к тебе побеждаеми, дерзаем смиренномудренно благохвалити тя пением таковым:

Радуйся, святяя Православныя веры и Церкви светильниче немерцающий;

Радуйся, Российския страны оградо неборимая.

Радуйся, смирением гордыню душепагубную поправый;

Радуйся, кротостию ярости пламень погасивый.

Радуйся, сребролюбие возненавидевый;
Радуйся, всякие досаждения и обиды без
гнева претерпевый.

Радуйся, яко молитвами непрестанными
уныние прогнавый от себе и достигнувый о
Господе радования;

Радуйся, победныя почести от Христа Бога
свыше приявый.

Радуйся, при животе и по смерти от Господа
чудес даром обогащенный;

Радуйся, во благоухании святыни во обители
твоей почиваяй.

Радуйся, преподобне Лаврентие, усердный и
богоприятный о душах наших молитвенниче.

Кондак 10

Спаستися нам мучения вечнаго умоли
Всевышняго Творца, угодниче Божий
Лаврентие, и не лиши ны помощи твоея святыя
в час кончины нашея, егда духи нечистыя
смутят ны привидении своими: тогда явися нам
заступник усерден, молитвами твоими избавляя
ны от их наветов и сподобляя лицезрения Ангел,
и пения с ними Богу: Аллилуиа.

Икос 10

Стену заступления и молитвенника
благоприятна к Богу обретше тя, отче
Лаврентие, благодарение Отцу Небесному

усердно возсылаем, за вся благодеяния Его, тобою нам обильно являемья, тебе же предстоятелю нашему сице глаголем:

Радуйся, обители Троице-Ильинския утверждение и похвало;

Радуйся, града Чернигова покрове Богом данный.

Радуйся, монашествующих ликом пречудная красото;

Радуйся, христианскому роду присное утешение.

Радуйся, обидимых сильный заступниче;

Радуйся, сирых и убогих благонадежное пристанище.

Радуйся, душевных и телесных недугов благий целителю;

Радуйся, радости всем нам вечныя известный ходатаю.

Радуйся, яко пророческия твоя слова и изречения исполняются;

Радуйся, небесный наш покровителю.

Радуйся, преподобне Лаврентие, усердный и богоприятный о душах наших молитвенниче.

Кондак 11

Пение хвалебное воспеваем ти, преподобне отче Лаврентие, и с любовью припадаем раце святых чудотворных и многоцелебных мощей

твоих, прославляя терпеливое твое житие, безмолвие твое высокое, смирение нелицемерное, молитву непрестанную, воздержание совершенное и чистоту боголюбезную души и тела; о всеблаженне, помози и нам подражати твоим добродетелем, да возможем богоугодно пети Создателю нашему Богу: Аллилуиа.

Икос 11

Светильник добрых дел быв еще при животе, отче преподобне Лаврентие, светильник светозарный Божия благодати явился и по смерти, сияя чудесы и исцеления источаеши от нетленных мощей твоих, иже по четырнадцати трех летех, яко сокровище драгоценное, целы и благоуханны обретошася и поставлены быша во храме Пресвятыя Троицы Троице-Ильинския обители, в ней же многа лета потрудился во благо и земное жительство благочестиве скончал. Тебе, прославленному от Господа, дары песней духовных приносим, умиленно зовуще сие:

Радуйся, нетления цвете благоуханный;

Радуйся, свято процветший крине Рая

Иисусова.

Радуйся, светлостью чудес твоих озаряя мрак душ наших;

Радуйся, от болезней многообразных

благодатный целителю.

Радуйся, ран греховных врачу
благоискусный;

Радуйся, скорбящих утешителю
радостотворный.

Радуйся, грозный карателю обидящих;

Радуйся, обители твоея страж неусыпный.

Радуйся, житие твое всему миру явивый и
пророчество ему предрекий;

Радуйся, вся земли концы твоим святым
житием Православныя люди удививый.

Радуйся, преподобне Лаврентие, усердный и
богоприятный о душах наших молитвенниче.

Кондак 12

Благодати велия сподобився от Господа,
треблаженне отче Лаврентие, и по достоянию
чудотворец наречен быв: ибо не токмо при
животе, но и по смерти, величием твоих чудес
всех удивляеши, и ко славословию
всемогущества Христова подвизаеши, во еже
пети Верховному чудес Творцу Святых
Святейшему Слову: Аллилуиа.

Икос 12

Поем велия подвиги твоя, добропобедне
воине Христов, отче наш Лаврентие,
победоносно победивый видимыя и невидимыя
враги, ублажаем блаженную кончину твою, и

молитвенно торжествуем святую память твою,
тебе усердно воспевая тако:

Радуйся, яко память твоя с похвалами и
успение со святыми;

Радуйся, со безплотными силами Трисвятую
песнь Богу поеши.

Радуйся, со пророки и апостолы
торжествуеши;

Радуйся, со святители и мученики
прославленный.

Радуйся, со преподобными и праведными
безсмертия венцем увенчанный;

Радуйся, свете, мрак антихриста бесовских
полчищ разгоняющий.

Радуйся, Руси Святыя Богом данный
заступниче и покровителю;

Радуйся, благоверных поборниче и
победоносче.

Радуйся, тобою же Православная вера
прославися;

Радуйся, тобою же вражие нечестие
посрамися.

Радуйся, преподобне Лаврентие, усердный и
богоприятный о душах наших молитвенниче.

Кондак 13

О преподобне и богоносне отче наш
Лаврентие, великий чудотворче и скорый

помощниче, тя молим и тя просим: милостиво приими от нас похвальное пение наше, тебе усердно приносимое, ты же предстоя Престолу Царя Славы, Господу Богу всея твари Создателю, умоли Его благость за ны грешныя, да простит нам согрешения наша вольная и невольная, сохранит ны от лица богомерзкаго грядущаго антихриста и богопротивных слуг его, враг видимых и невидимых, от смертоносных ран и недугов, от всякия скорби и печали житейския, и вечнаго мучения избавит ны, и сподобитися во Царствии Небеснем со всеми святыми Пресвятей Троице пети: Аллилуиа.

Этот кондак читается трижды, и затем икос 1-й
и кондак 1-й



**ПОЛНЬІЙ
АКАФИСТНИК
КАНОНИЧЕСКІЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**